

Bbaruha gya Paulo Gyakabiri hali Timiteo Kwanjuura

Bbaruha gyakabiri gya Timiteo gya-handiikiirwe Paulo, mukwenda wa Yesu Kurisito. Yaagihandiikiiri Timiteo naali mu biro byamwe bikusembayo nihali hasigeeriyo mwanya gudooli, Neero mukama wa Buruumi aragire Paulo bamwite. Mu bwire buhwo haalingiho kurumbwa kunene hali beikiriza ba mu masaza gensej ga Baruumi. Nahabwakikyo nka kuyaali akoori mu bbaruha gyamwe yakubanza, na mu bbaruha gigi yakabiri, yaalambiri Timiteo ha bigambu bikukwatagana na bwire buzibu bukwiza mu meiso (3:1) na ha beegesa ba bugobya (3:5-9).

Paulo yeekambisiryeye Timiteo kwicala neikiririza mu bukwenda bwa Yesu Kurisito kandi naabutebya atakutiina, kadi mu kurumbwa. Kintu kihandu kya kubanza na kubanza kili nti, bbaruha gigi gyekambisya bantu kugumisirizanga mu hiro bizibu. Bantu bakusemeera kukyega nti, Ruhanga yooyo agira busobozi bwa kuhulukya kigambu kikusembayoona hali muntu; kandi de nti, bahwo bantu beikiririza muli yo, Ruhanga abaha mpeera. Bwomi bwa Paulo huli kyakuwoneraho kirungi ha nsonga gigi.

Bicweka Bihandu bya mu Bbaruha gigi nka Kubihonderegeeni

- (i) Bĩramũkyo na bigambu bya kwekambĩsya Tĩmĩteo 1:1-18
- (ii) Paulo niyeekambĩsya Tĩmĩteo abbe mutatiro 2:1-13
- (iii) Paulo niyeegesya Tĩmĩteo ha bintu bikwahukana 2:14-26
- (iv) Paulo naahaḅura Tĩmĩteo ha bintu bikugyenda kubbaḅo mu ḅũsumi ḅwa mu meiso 3:1—4:8
- (v) Bigambu bya Paulo bikusembayo biyaaweereeri Tĩmĩteo 4:9-22

Bĩramũkyo kuruga hali Paulo

¹ Bbaruha gigi girugiri hali gya Paulo, mukwenda wa Yesu, Mutongoole wa Ruhanga kandi wa Ruhanga, munyakutumwa kuweera bantu bigambu bya ḅwomi biicala mu Yesu, Mutongoole waamwe.

² Ngihandiikiiri we Tĩmĩteo, mwana wa ha mutima gwange. Nĩnkuramũkya; kandi Ruhanga Bbaa weetu na Yesu, Mutongoole wa Ruhanga, Mukama weetu bakugiire mbabazi, bakukwatirwe kisa kandi bakuhe ḅũsinge.

³ Tĩmĩteo, nkusiima Ruhanga nti, biro byensej, ijolo na mwinsi, ncala ninkusabira hali yo. Kandi nkumusiiima haḅwa kumpa kumũramya, nka bahaaha beetu kũbaakolengi kadei, nkyegiri nti, mutima gwange guli gũsyanyũ.

⁴ Nnzuka mbe ḅujune ḅunyakukukwata ḅutwahũkeeni nawe, kandi kyokyo nkwendeerya kimwei kwiza kukwo turombe.

Haḥwakubba ḥṭwakaromba, nkwiza kwezegwa kurungi hoj.

⁵ Na kintu kindi kinkwizukiraho kyokyo kigambu kya Mukama weetu kiweikiririzemwo na mananu. Ninzira de ninzizuka nzikiriza gya maawu, Yunisi, na gya zizaawu, Loyisi. Nkyegeeri kimweji nti, nawe kwokwo okukora nka bo kubaakorengi.

⁶ Nahawakikyo oteebeera kukoresya kisembu kya Ruhanga kiyakuheeri, budi bunyaakusabiiri nkuteeriho ngalu.

⁷ Haḥwakubba Ruhanga atuha kwahi mutima gwa ḥṭiini, beitu atuha mutima gwa kubba ba maani, kwendyangana nka beikiriza, na kwerinda.

⁸ Kale nu hataati, oteezegwa nookuswara kuweera bantu bigambu bya Mukama weetu Yesu Kurisito. Kadi rundi kuswara kubaweera nka kundi munyankomo haḥwa Mukama weetu Yesu Kurisito. Beitu, weeherayo kimweji nka gya kunyeeheeriyo kutebeerya bantu Makuru Garungi mu kuwonawona nka Ruhanga kwali kusoboresya kukora.

⁹ Haḥwakubba yooyo mukwendya kwamwe na mu mbabazize, yaacwirimwo kutujuna hali maani ga Sitaani, yaatufoora kubba bantu baamwe, hatali haḥwa bikorwa byetu, beitu haḥwa mbabazize. Mbabazi zaamwe zizo, yaazituheeri kuraba mu Yesu, Mutongoole wa Ruhanga mu biro bya kadei, atakahangiri gigi nsi.

¹⁰ Beitu hataati, nka kutwetegeriize atwolokeerye mbabazi kuraba mu kubyalwa

kwa mujuni weetu Yesu, Mutongoole wa Ruhanga. Kandi yaamaliraho kimwej maani ga lukuu, yaakoresya Makuru Garungi, kutumulikira bwomi bwa biro na biro.

¹¹ Yooyo yankomiri kutebeerya bantu Makuru Garungi, nankoma nka mukwenda waamwe kandi nka mwegesa.

¹² Kikyo kintu, kyokyo kimpeeri kuwonawona yati. Beitu nabwo, mutima gwange guli gutatiro, habwakubba yogwo munyakumpa gugu mulimo, ali mwesigwa. Nkyegiri nti, ali wa maani kandi akwiza kundinda kudoosya ha kiro kya Ruhanga alizikya nsi gigi gyensei.

¹³ Kwatira kimwej na maani bigambu byange bya mananu binyaakwegeseerye, otheo mutima kubihondera. Kandi okwatire kimwej bityo bigambu biweikiririzemwo, otheo maani ha kintu kya kwendyangana kutwendyagana nka beikiriza mu yogwo Yesu, Mutongoole wa Ruhanga.

¹⁴ Mwozo wa Ruhanga yogwo eicala muli twe, akuhe kulinda bintu byensei birungi bya Mukama weetu biyaakukwatiirye.

¹⁵ Nka kuwegiri mumu mwisaza ly'Asiya, buli muntu anyeehoogiri, mu bantu banyehoogiri, hoo ho hali Fijelo na Heremojene.

¹⁶⁻¹⁷ Beitu kandi, Onesifooro buyaali naacakadwa-budwe mu rubuga lwa Rooma, yaatandikiriho kuntolereerya kudoosya buyanzagiiirye. Nkusaba Mukama weetu agiire mbabazi bantu ba mu maka gaamwe. Kubba bityo biro byensei, yooyo eicala nampumuulya mumu mu nkomo, atakwegwa kuswara.

18 Nkusaba Mukama weetu, amujune mu mbabazi zaamwe ha kiro kikyoo kya Ruhanga alisalira bantu bensei musangu. Kubba bintu byensei biyankoleeri mw'Efeeso okubyega kurungi.

2

Mulwani Murungi wa Yesu Kurisito

¹ Hatu we mutabani, tatiira mu mbabazi za Ruhanga weetu zituteeraniza hamwe mu Yesu, Mutongoole wa Ruhanga.

² Kandi, bigambu bimbanga nimbaza hasyanu mu bantu banene, nkukusaba obitwale, obyegesye bantu beesigwa. Nabo de kwokwo balikora yatyo, bakwiza kubba nibakusobora kwegesya bantu bandi.

³ Beitu nka mulwani wa Yesu, Mutongoole wa Ruhanga, akuhondera biragiro bya mukama waamwe, ikiriza kuwonawona.

⁴ Mulwani yensei bwabba ha mulimo, akora bya muhandu waamwe akwendya, kyokyo yeezagya atakusobora kukora bintu bikwisana na bya bantu bensei.

⁵ Kindi, mwiruki yensei wa mbiro za mpaka tasobora kusinga mbiro, akatunga kisembu kutoolaho ekirize kuhondera biragiro bya zizo mbiro.

⁶ Kyokyo kimwe na mulimi yeekamba kukora na maani. Bintu biyaalimiri bubibba byeriri, yooyo akusemeera kubba wa kubanza na kubanza kubidyaho muntu wondi yensei atakabidiriho.

⁷ B_ib_yo bintu bindimukukuweera okusemeera kubitekerezangaho, haḥwakubba Mukama weetu akwiza kukuha kubyetegereza.

⁸ Bigambu bya Yesu Kuriṣito, Ruhanga giyaahimboori kuruga mu bakuu, kandi muniyakubyalwa mu kika kya Daudi mukama w'Isaleeri, gogo Makuru Garungi gantebya. B_ib_yo bigambu, otalibyebeera.

⁹ Haḥwa gagwo Makuru Garungi gantebya, kyokyo ncala nimbonawona, kandi kyokyo ndi mu nkomo, nka rundisi nyagumiri musangu gukooto hoi. Kandi gya, nabunyakabba nindi mu nkomo, kigambu kya Ruhanga tikisobora kulemwa kusaasaana.

¹⁰ Beitu, haḥwakubba Ruhanga ali na bantu baamwe baasoorimwo, kandi akwendya beeziremwo bibiibi byabu, kyokyo ngya nyehereeriyo kimweji kuwonawona. Kubba mu kuwonawona kwange, Yesu, Mutongoole wa Ruhanga, akwiza kubajuna hali maani ga bibiibi byabu, naabaha kitijinsa kya biro na biro.

¹¹ Kubba bigambu bya Ruhanga bikoba yati, Twakabba nituli baakukwa nayo, kwokwo de tulihimbooka nayo

¹² Twakagumisiriza bizibu nayo, kwokwo de tulilema hamweji nayo

Twakamusuula nitukakoba, tatumwegiri, kwokwo nayo alitusuula naakoba, tatwegiri

¹³ Twabba nitukukoba tuli kwahi beikiriza baamwe, beitu yo, akwiza kwicala naali mwesigwa hali twe, Kubba yo, eicala wa mananu biro byenseji.

Ruhanga Yendya Mukorĩ Akukora Birungi

14 Nahabwakĩkyo, oli nakwicala noopom-pogeerya kandi niweegesya bantu ba Ruhanga hasyanu mu meiso gaamwe, beehale kukuuta mpaka za bigambu bya Ruhanga zitali na mutwe na magulu. Mpaka zikwisana yatyo tizigasira bantu bakuzeegwa.

15 Kindi, weekamba kwicala nooli musyanu mutima mu meiso ga Ruhanga, nka muheereza wa Ruhanga atali na kintu kyensei kikumwiririirya inyuma, kandi kikusobora kumuha kuswaraswara kwegesya kigambu kya Ruhanga kurungi.

16 Kandi, weehale kukuuta mpaka zitali na mutwe na magulu. Habwakubba bantu beicala mu bintu bikwisana yatyo, badahira-budahiri hali Ruhanga.

17 Mpaka za yatyo ziicala zibiibi zisana nka kihote kinyamapu nka kukidya mubiri gwa muntu. Haloho bantu babiri beeheeri mulimo gwa kwegesya bigambu bikwisana yatyo, boobo baba: Himenaayo na Filute.

18 Barugiri ha mananu ga bigambu bya Ruhanga, baakutebeeryanga bantu nibakoba nti, Ruhanga yaamaari kadei kuhimboola bantu baamwe kuruga mu kukwa, kandi nti, kuhimbooka kundi kukwiza kubbayoona mu biro bya meiso, kuli kwahi. Kale nu, mu mulingo gugwo bahabjirye beikiriza bandi.

19 Beitu go mananu ga Ruhanga, biro byensei geicalaho nka Binyakuhandiikwa kubikoba nti, "Yo Ruhanga bantu baamwe eicala abeegiri biro byensei, tihaloho gyateegiri," na kindi "Yogwo

yensej akwezeta wa Ruhanga, yeehale kukora bintu bibiibi.”

²⁰ Mu nnyumba gyensej gya kitinisa, habamwo bikwatu bya mugasu hoj, binyakukorwa mu feeza na zaabbu, na bindi bitali bya mugasu hoj, biheese na byeibumba.

²¹ Nahawakikyo, muntu yensej akwiza kwefaho akesyanya mutima gwamwe hatali kwicala nka bantu batakufaaho bigambu bya Ruhanga, akwiza kubba nka bikwatu bibyo bya mugasu hoj mu kukora milimo mya Ruhanga. Hawakubba bibyo bikwatu bilisoroorwamwo, aleke Mukama weetu abikoresye mulimo gwenesej gurungi guli gwa kitinisa.

²² Nahawakikyo, weehala ngesu zensej za kwegomba kubiibi za busigazi, weekambe kubba musyanu mu meiso ga Ruhanga, oikiririzenge mu bigambu byamwe, oicalenge niwendya beira baamu nka beikiriza, kandi oicalenge na businge mu mutima gwamu.

²³ Na kindi, bintu byensej bikukwatagana na mpaka za budomadoma zitali na mutwe na magulu, otazihondera, hawakubba, nka kuweegiri, mpaka za yatyo zileeta izongobo.

²⁴ Kandi tikisemereeri muheereza wa Ruhanga kuzongazongoba, beitu kyakusemeera kukora kyokyo kubba wa mbabazi hali bantu bensej, na kwegesya bantu kigambu kya Ruhanga. Takusemeera kubba na nnobi mu mutima gwamwe;

²⁵ beitu, muhaura bantu bensej batakwikiriza mananu ga Ruhanga; alina kuwona akwetj bantu mpula mpula. Hawakubba mu mulingo gugwo, Ruhanga akusobora kubajuna nibeeziramwo

bibiibi byaḅu, kandi nikibarugiiramwo kwegu mananu ga bigambu bya Ruhanga.

²⁶ Hejnyuma gya kwegu mananu, bakwiza kwetegereza nka kubahoniri ḅugobya ḅwa Sitaani. Haḅwakubba yo Sitaani kigyendeerwa kyamwe kyali kya kubecalya banyankomo ba bikorwa byamwe.

3

Bujune Būlibbaho mu Biro bya Kumaliira

¹ Kandi we, Tĩmĩteo, osemereeri okyege nti, mu biro bya kumaliira, Mukama weetu Yesu Kurisito naali heehi kwira kusalira bantu musangu, halibbaho bujune bunene hoj.

² Haḅwakubba mu biro biyoyu bantu balibba bantu bakwendya bya mitima myaḅu misimiri, batakufaaho bandi nka kubali; balibba na mururu gwa sente zinene. Bantu balibba na myehembo kandi bagayi. Balibba bajoogi kandi bantu batakutamwo kitinisa babyeru baḅu; balibba bahoonyola minwa kandi babiibi mu mitima myaḅu.

³ Balibba bantu bakuu mitima, batali na kuganyira mu mitima myaḅu, na magezi ga kwerinda, batakwefeeraho ḅwomi ḅwa bantu bandi; balibba bandaarya makuru haha na hadi, bataḅuku mitima kandi batakwendya kuwonaho kintu kyensej kirungi.

⁴ Balibba bagobya, ntabiganye, kandi bakwetembya kubba bantu ba hakyendi hoj; balibba bantu bendya kwicala mu kusemererwa saaha zensej, kukira kwendya bigambu bya Ruhanga.

5 Balibba bantu bakwefoora kubba bantu ba Ruhanga, beĩtu kandi batakwikiririza mu bigambu na maani ga Ruhanga. Nahabwakikyo, weehala bantu bakwisana yatyo.

6 Babwo badulu boobo bagyenda mu maka ga bakalĩ badomadoma mu nsita niboohya babwo bakalĩ, habwakubba bo bakalĩ nabo bankei, bakubbanga nibakwendeerya kimweĩ kukora bintu bibiibi, kandi batakusobora kwehala kukikora.

7 Beĩtu bakalĩ nka babwo tibalidwa hakwete-gereza mananu ga Ruhanga, kubba na bintu bihyaka bibabegeesya huli kiro, tibabikwata.

8 Nka Yaane na Yambere* kubaaswiri kukwata bigambu bya Mũsa mu biro bya kadei, kwokwo de na babwo bantu baswiri mananu ga bigambu bya Ruhanga. Bagwagiiri kimweĩ, na Ruhanga yaabanuga habwa bintu bibakuhondera.

9 Nahubaabba nibakwekora biyo bintu, tibakusobora kubikora kumala kasumi kalei, habwakubba bantu bensei bakwiza kudwa hakubeetegereza nka kubali bacoome; nka kubeetegeriize Yaane na Yambere kubba nibali bantu bacoome.

Paulo Naalamba Tjĩmĩteo

10 Beĩtu we, Tjĩmĩteo, bigambu byange binyeegesya bantu, na ngesu zange, na bigyendeerwa byange nka muntu, obyegiri. Bigambu bya Ruhanga binzikiririzamwo, kuteekana kunteekenĩ mu mutima gwange,

* **3:8 3:8** Yaane na Yambere baali bafumu banyakwesanasana, baakora byamahanu mu meiso ga Mũsa na Faraaho, mukama wa Misiri.

ngonzi zinyoolokeerye beikiriza ba Yesu bensej nka bantu ba luganda lumwej, kuwonawona kumbwenaweeni, biyo byensej de, obyegiri.

¹¹ Bantu bandumiri, na bandi bankuutiri na kunkuuta kusigikira ku bintu binyakubba mu mbuga za Antyokiya, Ikonio na Lisituura; biyo bintu byensej nyaabigumiri. Beitu Mukama weetu biyo bintu byensej yaabimponeerye.

¹² Go mananu gali nti, bantu bensej bakwendya kuhondera bya Ruhanga biyaaragiri Yesu, Mutongoole wa Ruhanga, balina kweteekanize, hawakubba banyanzigwa ba kigambu kya Ruhanga bakwiza kubalwanisya.

¹³ Kasi kandi bawo nkorj za bibiibi na bawo bagobya bakwiza kubba bibiibi hoj mu bugobya bwabu. Balihabya bantu, kasi kandi nabo bankei bantu bandi beire babagobye.

¹⁴ Beitu kandi we, kwatira kimwej na maani biyo bigambu biweikiririzemwo na bigambu bibakwegeseerye. Hawakubba bawo bantu banyakubikwegesya obeegiri.

¹⁵ Kandi, nka kuweegiri nti, waatandikiri kwegu Binyakuhandiikwa bya Ruhanga noocaali muto, biyo bigambu byobyo bikuheeri magezi ga kwikiririza mu Yesu, Mutongoole wa Ruhanga, yaakujuna kifubiro kya Ruhanga aliha bantu bensej bibiibi baswiri kumwikiririzamwo.

¹⁶ Bigambu bya Ruhanga byensej Binyakuhandiikwa, Ruhanga yooyo yaabiheeri maani gakubifoora bya mugasu mu mitima mya bantu baamwe. Yaabibaheeri bibahe kwegesya bantu, kuwona nsobi zili mu bantu, kubahura

na kuḃeegesya nka kubakusemeera kwicala.

¹⁷ Mu muḃingo guḃwo, Ruhanga abba na kuha bantu baamwe magezi ga kukora mulimo gwen-sej gurungi.

4

¹ Yesu, Mutongoole wa Ruhanga, ḃwaliira kulema ḃukama ḃwamwe, alisalira bantu bensej musangu, bakuu na boomi. Nahḃwakikyo, Ruhanga hamwenya na Yesu, Mutongoole waamwe, nibali bakeiso bange, nkukulamba:

² Icalanga weteekaniize kuḃeerya bantu, bigambu bya Ruhanga. Nahḃwabbanga ḃwire ḃwa bantu ḃubakwendeeryamwo kwetegeerya, rundi habatakwendeerya kwetegeerya, otebyenge bigambu bya Ruhanga. Okuteekwa kwolokyanga bantu, bintu bibiibi ḃibakoorj, noobaweera baleke kubikora. Beitu kandi de, okuteekwa kuḃeiryangamwo maani; ḃuḃwo nu, nookuḃeegesya na kugumisiriza kunene hoj.

³ Nkulambiri okore biyo, haḃwakubba kasumi kakugyenda kudwa, ka bantu bakwiza kubba batakwendya kwetegeerya nzegesya gya mananu gya Ruhanga. Mu kiikaru kya nzegesya gya mananu, bakwiza kwendyanga kuhondera bintu byaḃu bo ḃibakwendya, nibeetooleerya beegesa baḃu banene, beize babaweere bigambu, bo ḃibakwendya hoj kwegwa.

⁴ Bantu, bakwiza kuruga ha kuhondera mananu, nibata mitima myaḃu ha bihanuuro ḃitali na mugasu.

⁵ Beitu we, mu muḃingo gwensej guwaakab-bangamwo, okusemeera kwicalanga oteekeeni

niweegyendereza, kandi de, weeheeriyo kuwonawona. Bantu, baweerenge Makuru Garungi gakukwatagana na Yesu Kurisito, kandi, okorenge huli kintu kyenseenya, kyokusemeera kukora nka muheereza wa Ruhanga.

⁶ Okuteekwa kuhondera bibyo bintu binkuweereeri, habwakubba gya nabundoho, nsigaliirye kasumi kadooli hoj, Ruhanga antoole mu nsi.

⁷ Gya nabunyakabba nceeri nindombya bizibu binene mu kukoora Ruhanga, nyeekambiiri kimwej kumukoora, nka mwiruki kuyeekamba kuwona asingiri mbiro. Ndoori ha kumaliriza mulimo gwa Ruhanga guyampeeri kumukoora, nka mwiruki kwadwa ha mbiro zikumalikira. Kandi de, ntebeerye bigambu bya Ruhanga, nindi mwesigwa.*

⁸ Nahabwakikyo, nkugyenda kutunga kisembu, habwa kudoosereerya kurungi biragiyo bya Ruhanga. Yogwo Mukama, asala misangu mu bwijjanjanu, yooyo ha kiro kya kumaliira, akwiza kumpa kikyo kisembu. Kikyo kisembu, alikiha kwahi gya muntu omwej; alikiha na beira bange benseenya, babwo bataaha bamulindiriri eire.

Paulo Niyeta Timoteo Eize Bwangu hali Yo

⁹ Weekamba hoj, kuwona nti oiziri wangu, hali gya;

¹⁰ habwakubba, Deema yendeerye hoj bintu bya nsi, byamuleetereerya kundugaho,

* **4:7 4:7** Bbajbbuli zindi zikoresya Nyalweni kulwana kurungi, nyadoosereerya lugyendu lwange, ndindiri kwikiriza.

yaagyenda mu ruḅuga lwetwa Sosolonika. Kereseke, yo yaagyendiri mu nsi gyetwa Galatiya, kandi Tito, yo yaagyenda mu kicweka kyetwa Dalamatiya.

¹¹ Hataati, mu bahwo bantu banyalingi nabo, Luuka yooyo musa, ginsigaliirye. Bwolibba nookwiza, owone Mariko mwize nayo, habwakubba akwiza kunjuna mu mulimo gunkukora.

¹² Tikiko yoodede, nyaamutumiri agyende mu ruḅuga lw'Efeeso.

¹³ Bwolibba nookwiza, ondeeteregene kyakulwala kyange kya hakyendi kya mu bwire bwinyamu, kinyaatigiri mukori mwira wange Karipo, wa mu ruḅuga lwa Turoowa. Kandi de, ondeeteregene bitabbu, na kukira maani, bilyo bya mugasu hoj, binyakukorwa mu bikuta.

¹⁴ Alekizanda, mwokya byoma, yankoori ku-biibi hoj; Mukama alimusasula habwa bilyo bilyaakoori.

¹⁵ Naweede, osemereeri omwerinde atakukola kubiibi, habwakubba bukwenda bwetu, twe nawe bututebya, yaaunobeeri kimwej.

¹⁶ Murundi gwange gwa kubanza gunyemereeri mu meiso ga musali wa misangu kwetonganaho, hatakabbeho kadi muntu omwej, munyakuntonganiira; bantu bensej, banzirukiri. Nkusaba Ruhanga atalibafubira, habwa butasagika.

¹⁷ Bejtu kandi, Mukama yaali nanya; yampa maani, nyaasobora kutebya bukwenda bwenseenya bwa Ruhanga buyampeeri

ntebeerye Banyamahanga bensej, baḃwegwe. Kandi de, Mukama yanjuniri, baabula kũnsalira, musangu gwa kukwa.

¹⁸ Kandi de, Mukama akwiza kunjuna hali bintu bibiibi byenseenya, antwale dwe, mu bukama ḃwamwe ḃwa mwiguru. Kitĩinisa kibbe hali Mukama biro na biro! Amiina.

Paulo Naaraga

¹⁹ Ondamukiirye Akwila, na mukali waamwe Purisila. Kandi de, ondamukiirye na bantu ba mugĩ gw'Onesiifoo.

²⁰ Erasito yaasigeeri mu ruḃuga lukooto lwa Kolĩso; Turofimo yo nyaamutiga mu ruḃuga lwa Mileeto, ahimbiri.

²¹ Olwanisye hoĩ nka kwokusobora, kuwona nti oiziri, ḃusumi ḃwinyamu ḃutakabbeerĩ kudwa.

Yubbulo, Pudensj, Liino, Kilawudiya, hamweĩ na beira beetu bandi benseenya, beikiririza mu Yesu Kurisito, bakuramukiirye.

²² Mukama eicale na Mwozo gwamu; kandi, na mbabazĩ za Ruhanga, ziicale hamweĩ nanywe nywenseenya.

Ndagaanu Gihyaka
Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

b2d1b010-ce36-53f8-94bb-ea31f34239cc